



LIPOTI MO LE FONO AOA FAITULAFONO

**“Tulafono Tau Faaofi o le Pulega o Faiga Faiva
2015”**

**Komiti o Oloa Gaosia Tulaga Muamua, Mataupu Tau Pisinisi,
Alamanuia ma Leipa**

(Tuuina atu i le Fono Aoa Faitulafono)

1. FAUTUAGA:-

E fautuaina e le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa ia le Fono Aoaofaitulafono ina ia faautagia lana Lipoti.

2. TULAFONO TAU FAAOFI NA ILOILOINA:-

(Tuuina atu 13/08/2015)

Tulafono Tau Faaofi o le Pulega o Faiga Faiva 2015.

Na iloiloina e le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa ¹ le Tulafono Tau Faaofi o le Pulega o Faiga Faiva 2015 (TTF) e tusa ai ma le Faatonuga na tuuina mai e le Fono Aoaofaitulafono i le aso 13 Aukuso 2015.

3. TAUALUMAGA:-

Na valaauina e le Komiti le mamalu o le atunuu e ala i se faasalalauga faalauaitale i luga o le Televisi (S.Q.B. TV 1), o le leitio faasalalau a le Faalapotopotoga o Faasalalauga (2AP) ma le upega tafailagi a le Ofisa o le Fono, mo ni finagalo faaalua po o ni finagalo tusitusia e faatatau i lenei TTF. Peitai e leai se tasi sa mafai ona faaooina mai sona manatu i luma o le Komiti e uiga i lenei TTF.

Na tapā e le Komiti le fesoasoani a i latou nei a o faagasolo ana iloiloga.

FESOASOANI (T. T. 156)

Ofisa o le Loia Sili:

Loretta Teueli	-	Loia Sili Lagolago
Kylie Wilson	-	Loia Ofisa

Matagaluega o Faatoaga ma Faigafaiva:

Joyce Samuelu Ah Leong	-	Ofisa Sili Lagolago
------------------------	---	---------------------

¹ E tusa ai ma aiaiga o le **Tulafono Tumau 174** o le a avea ma tiute o le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa le:-

- (a). Iloiloina o so o se tulafono tau faaofi, talosaga po o so o se isi mataupu ua tuuina atu e le Fono Aoaofaitulafono ma Tala Faatatau o Tupe po o le toe iloiloina o le faatinoina o galuega a matagaluega e pei ona tuuina atu i ai e le Komiti o Tupe Maua ma Tupe Totogi;
- (b). Suesueina o faiga faavae, pulega ma tupe alu a matagaluega ma faalapotopotoga a le malo po o nisi faalapotopotoga e fesootai oloa gaosia tulaga muamua, mataupu tau pisinisi, alamanuia, leipa ma tagata tafafao maimoa.

4. SAILILIGA:-

Faamauina e le Komiti o lenei TTF o le a soloia ma suia ai le Tulafono Autu o Faiga Faiva 1988 ('Tulafono Autu') ma le Tulafono o Faigafaiva (Faasaina o Faiga-Faiva i Upega Faatafea) 1999.

Faailoa e le Matagaluega o lenei TTF sa amata faatalanoaina mai i le tausaga 2006, ma sa tuufaatasia ina ua maea le tele o faatalatalanoaga ma paaga eseese e iai o latou sootaga ma punaoa o le gataifale ma faigafaiva e pei o le au-tautai, Matagaluega a le Malo, Faalapotopotoga Faaitulagi ma Faa-le-malo, ma afioaga. O le iloiloaina o le Tulafono Autu sa faatinoina i le maea ai ona sainia e Samoa o le Maliliega tau Faigafaiva i le Faasaoina ma Puipua o l'a Feoi Mamao i ogasami i sisifo ma tu totonu o le vasa Pasefika (Western Central Pacific Ocean). O le naunautaiga, ina ia o gatasi lenei iloiloga ma le manaoga ina ia faamalosia le pulea tatau ma le faatonutonuina o atinae e afua mai i faigafaiva i ogasami loloto, aloalo ma aau o Samoa.

O lenei TTF ua faataoto mai ai vaega autu e limataitaia ai le pulea tatau ma le faasaoina o punaoa o le gataifale, aemaise o le faatonutonuina lelei o atinae tau faigafaiva i gataifale o le atunuu. E pei ona faamauina, o faamoemoega ma sini autu o lenei TTF ina ia:

- Faatonutonu faaletulafono ma faafoe tulaga o le faasao, pulea ma le atiaaina o faiga faiva, e aofia ai fuafuaga tau puleaga o faiga faiva;
- Faatonutonu faaletulafono gaiouga tau faiga faiva e aofia ai le faasoasoina o aia tatau tau faiga faiva, faaolaivai, faiga faasaina o fagotaga ma auala e toe utaina ai i isi vaa ma taulaga;
- Faatonutonu faaletulafono le laiseneina o vaa fagota, e aofia ai vaa fagota mai atunuu ese ua faamoemoe e fagogota i totonu o ogasami o faiga faiva a Samoa;
- Faafoeina vaa fagota o Samoa i fafo atu o ogasami o faiga faiva o Samoa;
- Faatonutonu faaletulafono le sainia o feagaiga tau faiga faiva, maliega tau faiga faiva e avanoa i ai, faiga faiva faapisinisi ma isi maliega po o faatulagaga;
- Faatonutonu faaletulafono le gaosiga, fefaatauaiga ma le maketiina o i'a ma oloa tau i'a; ma
- la aiaia ai mo faiga e faamalosia ai.

Faamauina o lo o mausali ma tumau faiga faavae o lo o i totonu o le Tulafono Autu i le TTF lenei o lo o iloiloaina ma ua saga faamalosia, faamanino, ma faafaigofie le gagana i faiga faaona-po-nei i mataupu tau puleaina ma le atinae tatau o Faigafaiva ma ana punaoa.

5. ILOILOGA AUILILI O LE TULAFONO TAU FAAOFI:-

I le iloiloaina auiliili o lenei TTF ua faamalieina le Komiti ma o lo o talafeagai aiaiga uma ua faatulaga mai.

6. IUGAFONO:-

I le maea ai o iloiloga a le Komiti na faaiugafonoina ai e fautuaina le Fono Aoa, **Ina ia faagasolo le Tulafono Tau Faaofi o le Pulega o Faiga Faiva 2015 e aunoa ma se teuteuga.**

7. SAINIA E LE KOMITI.

Afioga Hon LEAUPEPE Toleafoa Apulu Faafisi.
TAITAFONO.

Afioga MAUALAIVAO Pat Ah Him
SUI TAITAFONO

Afioga AFUALO Wood Uti Salele
SUI USUFONO

Afioga TIALAVEA Fea Tionisio Seigafo
SUI USUFONO.

Afioga Hon AEAU Peniamina Leavaiseeta
SUI USUFONO.

Tofa FAIMALOTOA Kika Stowers
SUI USUFONO.

Tofa AVEAU Tuala Lepale Niko Palamo
SUI USUFONO.